

INUIT ATAQATIGIIT

Inatsisartuni



15.marts 2024

UPA24/46

Naqqiut

Siunnersuut 1. Marts 2024-imeersoq taarserpaa.

(Uku naqqinneqarput: Qulequtami taasissutissami "Allannguut UPA2025-mi naammassereersimassaaq" ilanngunneqarpoq, kiisalu pisortanut aningaasatigut allaffissornikkullu kingunerisassai 250.000 koruuniusut ilanngunneqarlutik)

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naartunermi, erninermi meeravissiarternermilu sulinnigiffeqartarneq pillugu Inatsisartut inatsisaata allanngortinneratigut inuit qitornaminnik, aappaminnik inooqatigisaminnilluunniit toqukkut annaasaqarsimatillugit qaammatit pingasut angullugit aningaasaateqarfimmit akiliunneqarlutik sulinnigiffeqarsinnaanissaat anguniarlugu Naalakkersuisut peqquneqarnissaannik Inatsisartut aalajangiiffissaattut siunnersuut. Allannguut UPA2025-mi naammassereersimassaaq.

(Inatsisartunut ilaasortaq Peter Olsen, Inuit Ataqatigiit)

Tunnqavilersuut:

Angajoqqaanngorsimasugut kikkugualuaruttaluunniit aqqusaarusunnginnerpaasaatta misigerusunnginnerpaasaattalu ilagilluinnarunarpaat, suli nammineq inuutilluta qitornarisatsinnik annaasaqarnissaaq.

Angajoqqaajusummi akornanni oqaaseq una aamma oqaatigineqakkajuttartoq tamatta tusarsimassagunarparput;

"Qitornarami siulliulluni toqussagalarpat, silarsuara sequmiivilluni sequmissaaq ; Anilliarfissaaruttutullu ilillunga suna tamarmi taartuinnangussaaq, qanorlu ilillunga taartuinnarmiit anillariassanerlunga qanorlu qaangerniarumaassanerlugu nalulluinnnaqqissaassavara, artussavara sapissavaralu"

Taamaattumik angajoqqaasugut qitornatsinnillu suli annaasaqarsimangitsugut nalulluinnarparput takorluuginnarsinnaavarpullu qitornatsinnit annaasaqaraluartutta ilumut qanoq ajortigisinnaatigisoq, annernartigisinnaasoq, artornangaartigisinnaallunilu oqimaatsigisinnaatigisoq.

Tassa kisianni ajorluartumik, angajoqqaaqatinnguatta akornanni inoqarpoq taamatut aqqusaarusunnginnerpaasatta ilaannik ajoraluartumik, alianaraluaqisumillu misigisaqarlutillu aqqusaagaqarsimasut.

Akornatsinniittoqarpoq toqungasumik qitornartaarsimasut. Assigiinngitsunillu peqquteqartumik naalungiarsunnguamik toqusoorsimasut. Atualertussanngortooraluarlutik toqusoorsimasut. Atuartuutinnguaminnik toqusoorsimasut, minnerunngitsumillu inuusuttorsuanngoruttortumik, erlinnarseruttortumik, piukkunnarseruttortumillu assigiinngitsunik aamma peqquteqartumik ajoraluartumik akornatsinniittoqarpoq angajoqqaajusunik aamma qitornamik annaasaqarsimasunik.

Takorluuinnarsinnaavarput aannaasaqarneq taamaattoq qanoq annernarluni, oqimaatsigalunilu alianarsinnaatigisoq. Aliasunnerup qaangerniarnissaa anigorniarnissaa qanoq sivisutigisinnaallunilu artornatigalunilu ajornakusoorsinnaatiginersoq takorluuginnarsinnaavarput.

Aamma taamaappoq ukiorpassuarni aapparispap inooqatigisap, nularisap uigisalluunniit toqukkut qimagunneratigut annaasaqarneq. Annaasaqarneq taamaattoq qitornarisamik annaasaqarnertulli alianartigalunilu, qaangeruminaasinnaatigisinnaavoq.

Taamaakkaluartorli taamatut annaasaqarsimasut ajoraluartumik periarfissaqanngillat aliasunnermi nalaanni sulinngiffeqarnissaminnut. Inuilli ilaat qanoq atorfeqarnertik apeqqutaatillugu periarfissaqarput ulluni arfineq pingasuniit ullut 14-it tikillugit sulinngikkallarnissamut.

Qitornatsinnik, ukiorpassuarnilu aapparimasatsinnik, nuliatsinnik uitsinnilluunniit annaasaqarsimatilluta piffissamik sivisunerusumik tunineqarsinnaasariaqaraluarpugut aliasunnissatsinnut, nukimmillu katersinissatsinnut.

Imaanngitsoq tassa annerpaamik ullut 8-it qanngiutiinnartullu tassa asu, aliasukkunnaarlusi suliarborniaritsi.

Naamik, uanga isumaqarpunga tamanna ajortoq, pitsaasuunngitsoq aamma allanngortittariaqarpoq.

Qaniginerpaasatsinnik annaasaqarsimatilluta ulluni arfineq pingasuinnaanngitsuni sulinngiffeqarluta aliasussinnaatitaasariaqarpugut, katsorsarluta nukissamillu katersisinnaaqulluta.

Piffissanngorpoq, inuiaqatigiittut eqqartussallutigu qaniginerpaasatsinnik toqukkut qimatuttoqarsimatillu aliasunnerup nalaani qanoq periuseqartassanerluta.

Inuiaqatigiittut immikkut ittumik iliuuseqaratalu immikkut ittumik siunertamut tassunga aningaasaliissuteqanngikkutta, siunissaq eqqarsaatigalugu iliuuseqannginnerput allannguinninnerpullu inuiaqatigiinnut tamanna akisunerujussuanngorsinnaavoq. Tamatsinnut pitsaasuunngilaq peqqinnanngilarlu.

Taamattumik tamanna tunngavigalugu qaniginerpaasamik annaasaqarsimasut, aliasunnermi nalaanni qaammatit pingasut tikillugit sulingikkallarsinnaanerannik periarfissiisoqartalernissaannik inatsisartut aaliangiffigisassaattut siunnersuuteqarpunga.

Nuannersumik angusaqarfiulluartumillu oqallittoqarnissaannik kissaassillunga. Qujanaq.

Pisortanut aningaasatigut allaffissornikkullu kingunerisassai:

Takuuk § 37 naapertorlugu apeqquteqaatiga normoqarpoq 165/2023

§ 37 naapertorlugu Naalackersuisunut apeqquteqaatiga naapertorlugu siunertaq pineqartoq nunatta karsianut imatut naleqarsinnaavoq: Malugiuk uani pineqarpoq qaammatini arfinilinni sulingiffeqarneq.

Angajoqqaanut qitornarisamik 18-it inorlugit ukiulimmik annaasaqartumut: 2.634.263,42,-

Angajoqqaanut inersimasumik qitornalinnut annaasaqartunut: 6.973.050,24,-

Inunnut aappaminnit inooqatiminnilluunniit annaasaqartunut: 6.164.176,41,-

Katillugit: **15.771.490,01,-**

Taava qaammatini pingasuni taassuma kisitsisip affaa nassaarineqassaaq.

Qaammatini pingasuni **katillugit: 7.885.745,04,-**

Naatsumik oqaatigalugu Naalackersuisut akissuteqaamminni oqariartuutigaat aningaasatigut kingunissai qanoq amerlatiginissai erseqqissumik oqaatigineqarsinnaangitsoq.

Qulaani aningaasartuutit taaneqartut saniatigut AC-fuldmægtigip ukiup affaa suligasuarnissaa 250.000 koruuninik akeqassasoq naatsorsuutigineqassaaq.

Naartunermi, erninermi meeravissartaarnermilu sulingiffeqartarneq pillugu Inatsisartut inatsisaat nr. 5, 19. november 2020-imeersoq

Namminersortunut aningaasaatigut allaffissornikkullu kingunerisassai:

Soqangilaq.

Innuttaasunut aningaasatigut allaffissornikkullu kingunerisassai:

Soqangilaq